



E Protonebeschleuniger stoot in Gänf - kasch schwarzi Löcher mässe
Schwarzi Löcher sin sehr heftig - würde e Stadt ufffrässe
Doch dr Standort vo däm Grät finde mir wirgglig drastisch
Das Grät gheert doch nach Ziri - deert wär sone Loch fantastisch

Verspegguliere, Gäld verliere - d'Bangge kenne das guet
Mues sich kain wundere - wenn me s'Gäld unter s'Chüssi duet
Wie die mit däm Stutz umgöhn, es macht uns aggressiv
Sit das Gäld untrem Chüssi isch - findet d'Frau mi attraktiv

Vo Basel bis Mallorca fliege - zaalsch nur 30sig Stutz
E Taxifahrt kosched mee vo do zum Brune Mutz
Zum's glaine Budget schone hän mir denn grad welle
Vom Barfi us - noch Münchestai - e scheene Airbus bstelle.

Dr Nef hett vom höre sage - sini Ex abgschlage.
Schyynts hett är au no gsoffe - jo das macht uns ganz bedroffe
Sympatisch wirggt är nid uff uns; mir mache mit eich e Wett.
Das isch dr Ainzi - wo im Facebook - kaini Fründe hett.

Im Irak hett dr Bush - e Schueh an Grind bykoo
Jedem wo e Gwatsch verzellt - jo däm solls eso ergoo
No hätt denn ain e ächts Broblem - jo das wär zum lache
Denn chönnti dr Mike Shiva - e Lade mit Schue uffmache

Mir zwai hän scho lang emol welle e Opere gseh
Während dr Euro hetts denn - e Gratisvorstellig geh
Bi dr Mittlere Brugg hän mir - gluegt ganz intressiert
D'Oranjes hän dr fliegendi - Holländer iszeniert

Personefreizügigkeit - hett meh afangs Joor abgstumme
Die Wahle hän die denn - au tatsächlich no gwunne
Ich bi klar dergege gsi ha deheim glopft uff e Disch
Ich will drum nid – das mini Frau – no freizügiger isch

Zig Milliarde hän uns die - Ramschbapyyrli koschtet
Me hätt lieber mit däm Gäld - WC Papier boschtet
Es wär no scheen - farbig gsi - und s'hätti nur ain Nutze
Beides hett - gliche Wärt - nur mit däm kasch's Fuudi butze

Ziri brucht e neue Name und zwar ain mit Rasse
Sommerau – hän mir uns dänggt würd prima zu Stadt basse
E Nameswäggsel isch ächt böimig und no richtig schlau
Denn Ziri isch im Winter scheisse – und im Sommer au

I bi e Italiano - scho lang in Schwyz, nuntefano
Wohn in Klybeck mit mini Tanti und andere Imigranti

Weisch, in Schwyz i fühl mi wohl - aber viel Lüt sind scho hohl
Vorallem in Politik - jo mit Schlümpf kunsch halt nid wit

Problem gits au in mini Land - jede redet durenand
Z' Rom duet Papa predige – dr räscht duet Mafia erledige

Go schaffe gang i, i bi schlau - Summer, Winter mit Piaggio Ciao
Das Gäld für Benzin spar i - denn kauf ich bald Ferrari

Wenn i lauf uff Stroos vo Basel-Stadt - hey weisch isch scho glatt
Gumpt wieder eine in Rhy - meinsch bisch in Psychiatrie

Oder Bolizeichefe goht avanti - han i verzellt grad mim Tanti
Isch e normal – jo muesch verstoo - was will denn e Zürcher do

Gwalt, Alkohol und e biz meschugge - duet scho molto beydrugge
Aber ains das muesch gsee - so wirsch do Chef vo Armees.

So jetzt gang y ganz avanti - ins Klybeck heim zum Tanti
Die stooht sicher scho am Härd - mit Eich hett das eh kai Wärt

Fasnacht 2009